

## Zajimawe pro a kontra wočakować

**Njebjelčicy/Chrósćicy** (SN/at). Džensa popołdnu w štyrjoch skónči so doba, zo móžachu serbske towarstwa kandidatow za wólby Serbskeho sejma namjetować. Sydom wosobow je spěchowanske towarstwo Smy z.t. wčera w Njebjelčicach nominowało. Su to Dirk Mark, wědomostnik z Hogrozneje (Ogrosen) pola Wětošowa, Cornelia Šnipa, wodžerka hosći a terapeutka z Ptačec, Handrij Wjenk, diplomowy překupc z Rakec, historikar Alexander Pólk z Budyšina, Gerat Šram, diplomowy inženjer z Koćiny, Christof Haenel, socialny pedagoga ze Sedlišća, měšćanskeho džěla Złeho Komorowa, a rjemjeslnik Pětr Janak z Wuskidže (Weißkeißel). Z pomocu skupiny swójskich podpěračelow chce Dirk Pawlik z Myšyna pola Bórkowow kandidować. „Sym so pola wólbneho nawody dr. Domaški wobhonił, hač je tež na hinaše wašnje móžno wosoby namjetować hač jeno přez towarstwa. Nimo toho je mi moja strona CDU podpěru přilubiła“, rjekny mějićel młyna našemu wječornikej.

Po w redakciji dóštych informacijach je tuchwilu 38 kandidatow namjetowanych, z nich jědnaće z Hornjeje, 16 z Delnjeje a štyrjo ze srjedźneje Łužicy. Sedmjo bydla w Berlinje a w Drježdžanach.

Iniciatiwna skupina přepraša na zarjadowanje wo Serbskim sejmje džensa wječor do Chrósćic. W tym zwisku je předsyda Domowiny Dawid Statnik w e-mailce čłonom předsydstwa župy „Michał Hórnik“, kotraž redakciji předleži, za to wabił so wobdžěleć, „zo njesměmy dale napřečo sejmikej mjelčeć, ale zo měli so Serbja zjawnje tež přećiwo wólbam wuprajić. Na hinaše wašnje njebudže hewak widžomne, zo wjetšina aktiwnych a serbsčinu rěčacych Serbow akciju wotpokazuje“. Na naprašowanje zdžěli džensa Dawid Statnik: „Domowina je zajimowana na wěcownej a sprawnej demokratiskej diskusiji ... Wjacore čłonske cyłki a jednotliwcy su so na Zwjazkowe předsydstwo Domowiny wobročili a wo poručenje prosyli, kak z wabjenjom iniciatiwneje skupiny wobchadžeć.“

Za předsydu towarstwa Stup dale dr. Andreasa Klugu wotblyšćuje namołwa Dawida Statnika, „kak w etablěrowanych strukturach našeho ludu wo demokratiji mysla a z kotrymi metodami něchtó spyta, wo njej płódnu diskusiju z wukazom wothorjeka potłóčić“. Iniciatiwna skupina dyrbi so džensa wječor přeni raz na diskusiju z pro a sylnym kontra nastajić. Z toho móhl zajimawy wječork nastać.